

经鉏堂杂志卷一

宋雪川倪思正父

孝 庙 圣 德

赵八观察师禹，嗣秀王伯圭第五子，见访，语次孝庙圣德数事。微臣顷荷孝庙亲擢^①，所见者外廷事耳，若宫中之事，不能尽知。既有所闻，敢不登载以备史官之阙^②？

一 事

高宗初过德寿宫，凡供奉人各拨一半，谓如御服所十人拨五人、丝鞋所八人拨四人之类，既拨往，内侍奏乞人补填，孝庙云：“更不须得 朕无所用此。国家赋财有限 若诸处收补填阙 须顿添数百人请受 国用何以支吾？”竟不复补。

二 事

高宗丝鞋两日一易，御服三日一易。孝宗丝鞋两月一易，御服弊则易之，或时浣濯补纫。

三 事

孝庙既过重华宫，有一净斋，终日宴坐其间。止有一卓案，上沓书籍一部、圆砚一只、笔两管、墨一铤、纸两轴，四旁无他物。近珰尝奏：“高宗留下宝器图书不可数计，陛下当时取观玩，略享之。”孝庙云：“不然，高庙渡江，成中兴之业，功德盛大，故合享此。朕无功德，岂可享用？”珰云：“留在库藏，久必朽蠹，取而观玩，何损也？”孝庙云：“此皆是直钱之物，高庙所宝，万一将出，或

至损坏，便是不能守也”至后皆锁闭不启。

四 事

慈福庆寿，寿皇新作一袍，刺绣甚华，慈福见之云：“哥哥寻常不曾着此衣服，今何故如此？”寿皇对云：“政为妈妈万寿献杯之故。”慈福云：“哥哥可谓孝顺。”喜形天颜。寿皇亲捧寿杯，慈福不举手，就以口饮，感动之极，至于涕下。翌日，取此御袍匿藏之，云：“此我儿子孝顺，为我献寿，特为此服也。”

五 事

元夕后三日，宣嗣秀王及其诸子宴集，坐间寿皇云：“闻得外间鼓吹喧阗，想是民间欢乐。”嗣秀王对云：“此不可强。”寿皇云：“此如何强得？”嗣秀王云：“缘连年丰稔，民间稍康，所以致此。”寿皇云：“是，是。”嗣秀王因问：“元夕，寿皇圣帝对此良辰美景亦领略之否？”寿皇云：“十四日，嗣帝过此排当，十五日不饮。”嗣秀王云：“是夕如何度？”寿皇云：“是夜鼓琴两曲，人报月色甚佳，遂出，巡檐赏月。已而饮汤一杯，至二鼓就寝。大凡饮酒不可连日，令人神思不清。”又云：“人主没人道得，若不自制禁，任意恣纵，何所不可，非独酒一事也。”

六 事

每宣秀邸及诸子宴，食味极薄。寿皇语之云：“莫不嫌太简薄否？人饮食盘案虽极丰腆，所食不过一两箸，其余皆作践了，何如分作一两次，既不作践，又可频相会也。”

七 事

寿皇极简严，不甚发语，虽宴集，拱手终席，对诸瑯不呼其名，止呼其官而已。

八 事

寿皇坐侧有一牙签筒，牙签凡二十，半白半绿。酒樽至，出

白签斟止半杯 出绿签则满泛，一席之间用绿签止二三而已。

九 事

近珰奏当修重华宫，旧例须关，朝廷出钱下临安转运司应副。寿皇云：“我在南内，岂不知朝廷无钱？临安转运司亦窘。向来高宗缘德寿宫阙钱，所以朝廷极力应副，今我与嗣君是一家事，此间并无用钱处，所积甚多，只用宫中钱修，不必关。”闻南内遂以重华库钱计料翻盖，更不官差一匠及一夫。

此九事闻之赵观察，因记。小臣淳熙末备数翰林、权直宣至选德旁一小殿，忘记名，是时寿皇方持高庙之丧，裹白处布巾，服白处布背子，殿侧一间有小大柜，只是粗黑漆上设青绸坐褥三条、虎皮两片而已，以赵观察所言验之，则孝庙恭俭之德，表里如一，过汉文帝远矣。

孔 颜

学者自幼师慕孔、颜，孔子畏于匡，厄于陈、蔡，伐木于宋，削迹于卫。颜子一簞食、一瓢饮，在陋巷，人不堪其忧。夫以大圣大贤犹不免困厄如此，而卒以大圣大贤者，为其遭困厄而不屈也，然则困厄果非学者之耻？唯当学其处困厄而不屈者耳。

子 思

费子阳谓子思曰：“吾念周室，泣涕不可禁也。”子思曰：“然，此亦子之善意也。夫能以智知可知，而不能以智知未可知，危之道也。今以一人之身忧世之不治，而泣涕不禁，是忧河水之浊，而欲以泣清之也，其为无益莫大焉。唯能不忧世之乱，而患身之不治者，可与言道矣。”

子思不仕，不受国恩，故以身为重。若夫已出身而仕，受国恩深，虽在田野，亦当忧国，可也。

孔 子 建

孔子建与崔义为友，义仕新莽，为大尹，数以世利劝子建仕，子建曰：“吾有布衣之心，子有衮冕之志，各从所好，不亦善乎？且昔与子幼同志，故相友也。今子以富贵为荣，而吾以贫贱为乐，志已乖矣。乖而相友，非中情也。请与子辞。”今人见朋友富贵趋附之唯恐后^④，宁复有此高见耶？

原 宪

原宪贫，居，子贡连骑结驷而过之，谓宪曰：“夫子何病也？”宪对曰：“衣食不给者谓之贫，德义不进者谓之病，宪非病也，贫也。”子贡惭而退。子贡固陋矣，若宪者宜付之一笑可矣，未免与之辨对，亦未为高绝者也。

颜 觸

齐王见颜觸曰^⑤：“觸前。”觸亦曰：“王前。”宣王不悦，左右曰：“王，人君也^⑥，觸，人臣也。王曰觸前，觸亦曰王前，可乎？”觸对曰：“夫觸前，为慕势；王前，为趋士。与使觸为趋势，不如使王为趋士。”王忿然作色曰：“王者，贵乎？”对曰：“士贵耳，王者不贵。”王曰：“有说乎？”觸曰：“有。昔者秦攻齐，令曰：有敢去柳下季垄五十步而樵采者，死不赦^⑦；令曰：有能得齐王头者，封万户侯，赐金千镒。由是观之，生王之头，曾不若死士之垄也。”

此即晚食以当肉、徐步以当车之颜觸耶？抑别一人耶？

苏 秦

苏秦贫时，亲族薄之，及佩六国相印而归，前之薄者顿焉加礼，曰：“吾见季子金多也。”季子金多，于贫者何与？一旦见金多，顿为之加礼，宜为秦所鄙笑，而得以金多自骄也。

李 斯

李斯入秦，值秦厌诸侯客，下逐客之令，斯在逐中，亟上书，引物连类，言客有益于秦而无害秦，遂用之，自此致位丞相，官成名立矣。其后为赵高所让，下狱，父子俱戮东市，将刑，语其子：“吾虽欲与若复牵黄犬出上蔡东门，岂可得乎？”其言悲甚。嗟乎！使斯遭逐时不上书乞留，不过为布衣，其牵黄犬游猎于上蔡东门，可以终身无悔。及其见留，虽致身荣显，而父子俱戮，致坐一书之故。故曰：“祸兮福所倚，福兮祸所伏。”始斯为书生，见仓鼠而兴感，则其志专在利禄，故其见逐而上书，恐不得利禄也。后与赵高谋杀扶苏，立二世，恐失其利禄也。一有患得患失之心，终不免于大谬，可以为贪利忘义者之戒。

贾 谊

贾谊陈治安之策，乃在于《鹏赋》之后，岂其涉历世故，故于事理讲明尤更深究耶？故文帝前席，自以为不及也。与其初欲改正朔、易服色时所言时政，必大异矣。

延 笃

吾尝味爽，栉梳坐于客堂，朝则诵羲文之《易》、夏商之《书》、

公旦之典礼、仲尼之《春秋》，夕则消摇内阶，咏诗南轩，百家众氏，投间而作，洋洋乎其盈耳也，灿烂兮其溢目也，纷纷欣欣兮吾独乐也。当此之时，不知天之为盖、地之为舆，不知世之有人、己之有躯也。虽高渐离击筑，傍若无人；高凤读书，不知暴雨。方之于我，未足况也。且吾自束发以来，为人臣不陷于不忠，为人子不陷于不孝，上交不谄，下交不黜，从此而没，下见先君远祖，可不惭赧。吾尝读《延笃传》，有契于心，每三复焉。当是时，达如陈蕃、李固，穷如范滂辈，皆不能免，独笃优游里闾，以寿终。盖知几早退、逃名隐去之故也。

孔 明

孔明辅后主 先择贤者在人主左右 其《出师表》曰：“郭攸之^⑧、费祎、董允等 此皆良实 志虑忠纯 是以先帝简拔以遗陛下。愚以为宫中之事 事无大小 悉以咨之 然后施行 必能裨补阙漏，有所广益。”此孔明辅后主第一法也。初，亮自表后主曰：“成都有桑八百株 薄田十五顷 子孙衣食 自有余饶。至于臣在外任 别无调度 随身衣食 悉仰于官 不别治生。以长尺寸 若臣死之日 不使内有余帛 外有赢财 以负陛下。”及卒 如其言。握国柄者 苟不廉俭 何以率下 苟通赂、遗是非 必且倒置 何以服人？又小人谗毁君子，疑其营私，今乃了无所营，谗言何自入乎？此孔明辅后主之第二法也。

又

先主三顾草庐，时孔明年甫二十七岁，名望之重，若老成旧德，其亡也，止五十七。大抵人才见用于时不过三十年，古人四十而仕，七十告老，其间亦止三十年。孔明自二十七遇主，五十

七而终，适满三十年，岂其早达故不享上寿耶？今人无孔明才德，若复早达，是大可畏。第后世仕官不免待次，若计在任实满三十年者，亦自难得。仆二十登第，二十九方得禄，中间待次闲居又十余年，计实得禄未及二十年，岂造物者欲寿之耶？若使登第便得禄，又无齟齬，三十年已满，则大可畏矣。

三诸葛瑾为长，弟亮，族弟诞。

诸葛孔明仕于蜀，至子瞻死于忠义。诸葛瑾仕于吴，至子恪死于诛戮。诸葛诞仕于魏，及其身以兵死。三诸葛皆礼之后，分存三国，皆不免覆家。仅孔明仕蜀，从刘氏，合乎正义。子瞻死于忠义，为得其死。择祸莫若忠，当以孔明父子为法也。

孔融、荀彧

孔融、曹操不两立，孔融岂不知曹操险诈可畏，而每侮之者，知其终不免也。荀彧每事输忠于操，助成气势，而后其终亦不免于死。议者不知责或，而责融以不能全身远害，何哉？

张 季 鹰

翰谓顾荣曰：“天下纷纷，祸难未已。夫有四海之名者，求退良难。吾本山林间人，无望于时，子善以明防前，以智虑后。”荣执其手枪然曰：“吾亦与子采南山蕨，饮三江水耳。”翰因见秋风起，乃思吴中菰菜莼羹鲈鱼脍^⑨，曰：“人生贵适志，何能羁官数千里以要名爵乎？”遂命驾而归，任心自适，不求当世。或谓之曰：“卿乃可纵适一时，独不为身后名耶？”答曰：“使我有身后名，不如生前一杯酒。”身后名且不求，况身后利耶？

许 敬 宗

许敬宗与瀛洲学士十八人之选，观其对帝丘之问，盖博学多闻者，位至宰相，寿八十余，人许其才，天假以寿，而乃列奸臣传，不得与房、杜为辈，真可惜哉！

杜 牧 之

杜牧之名闻一时，累中科目，意气扬扬。入一寺，有僧静坐者，见之不顾，旁人为言，此先辈近日甚有名誉，僧亦不答，牧之茫然自失，以是知外名利者之高如此。彼方以趋名利者为可鄙，宜其视之邈如也。

白 乐 天

乐天平生无一不可人意者，诗文既高，立朝议论，忠直而有用于。为郡守，所至有遗爱。处谪地，不少挫屈于牛、李二党。取其长，弃其短，虽与之从游，而不为所污，亦不深为所害。晚年优游分司，有泉林胜境之乐，而又深明佛理，洞究性原，而其所得者全名高寿，禄位亦不为不贵，是真可慕羨者也。

又

乐天直节全名，深识远见，真可师慕。第不免有声色之好，平生事事皆如意，时以无子为苦，以此知佛谓此土为阙陷世界，真不妄也。

张 志 和

吴兴人指南门二十余里下菰菁山之间一带远山为西塞山也^⑩ 山水明秀 真是绝境。家有小舫 时时载酒浮游其上 当八九月，秋气澄爽，尤可爱玩，特恨无志和诗笔胸次耳。

柳 璨

读《唐书》 至柳璨曰：“负国贼柳璨死。”其宜矣 于是知为小人之果无益，而其自知亦甚明也。

林 希

林希在元祐已作大从官，与东坡为侪辈。章惇贬元祐诸公，欲其行辞下除掖垣 希意图进用 遂俯就之 既草东坡谪辞 掷笔曰：“坏了平生名节也。”其后仅迁丞辅大从官，与执政相去无几，名节一坏，遗臭后世，明知而明犯之，甚矣！官职之能坏人也。

后 山

后山与赵挺之俱为郭 槩婿 后山一生连蹇 章惇欲一见 后山竟不诣^⑪，高节如此。挺之附丽至宰相，然至今目为小人，以此知富贵不足道也。后山在京师，寒至无衣，赵挺之妻送衣与后山妻 后山却而不受 宁忍寒 其清又如此 可师仰也。

介 甫

荆公《字说》以转注假借皆为象形象意 此其所以为徇也 若

其间说象形象意处 亦自有理。其更新法 若顾役 至今用之 东南为便，不见其害。海外四州自旧不曾顾役，前十年守臣奏民间陈乞 欲从中州顾役 朝廷从之 当时攻之者一切以为不可行 力排之，此所以其心不服，故曰憎而知其善可也。

涑水、金陵

温公退居于洛十七年，荆公罢政，归金陵亦十余年。温公不唯天下重望归之，其心乐道，真得退居之适。荆公不唯得罪公议，其心负愧良多，身虽逸，而心无一日之乐。观二公出处，可以为鉴。

东坡、杨畏

东坡在嘉祐，立论务在变更；在熙宁，立论务在安静。在熙宁，力排募役；在元祐，乃主免役。盖唯是之从，而不徇时之好恶，此其所以为君子。杨畏在熙宁则从熙宁，在元祐则从元祐，在绍圣、元符则从绍圣、元符 时人目之曰“杨三变”。不顾是非而唯时是徇，此其所以为小人也。

邢恕、张商英

邢恕初从温公、伊川游，号为善士，后人绍圣党，为凶人。张商英初入绍圣党，至崇、观间反得时誉。人之善恶非有定也，在人而已。

汪彦章、李汉老

二公皆名士，特其初出蔡京之门，一时干进，以诗文献谏者

数矣，其言无所不至，后皆不敢编入文集。而其子孙乃有拾遗者，竟不免流传于世。欲人不知，莫若勿为。信哉，斯言。

臧 穀

臧与穀二人俱牧羊，俱亡其羊，问臧奚事？则挟策读书，问穀奚事？则博塞以嬉，其为亡羊一也。余谓不然，亡羊虽一，而挟策读书者终胜于博塞以嬉者。今有二人焉，一人为善，一人为恶，皆不免于死，然为善者终胜于恶者也。

炭小五达者

市达有炭市人大狙，谓之炭小五，家累巨万，京师未破时先十年，炭小五竭资妄用，十年之间荡尽。而京师遭虏寇，家资多者，括责金银，殆不聊生，反以为苦。所谓炭小五者，贫无所有，反不招累，岂其有先知智数耶？抑其败与时变会而适然耶？

赵、向地契

赵子固、向伯升 钱塘二佳士 其先大原人 靖康之初携家南渡，两家各有中原田契两笼。其初南渡时，日望恢复还中原^②。凭契书复故业，至今七十余年，藏契待时，竟成无用。金银珠玉既不可保，置田产有契书可保矣，而亦无用，是以知佛说万法归空之理为长也。

王昶戒子侄

夫富贵声名，人情所乐，而君子或得不处，何也？恶不由吾道耳。患人知进而不知退，知欲而不知足，故有困辱之累，悔吝之

咎。语曰：“如不知足，则失所欲。”故知足之足常足矣。览往事之成败，察将来之吉凶，未有干名要利欲而不厌^⑬、而能保世持家永全福祿者也。观昶所以戒其子者如此，而世俗见子弟多取名利以为能荣其家，而人又从而荣之者，是殆未知此理也。

《盘谷序》

儒者立论 往往矫激 多失之偏 独《盘谷序》论穷达二致 其说曰：“吾非恶此而逃之 是有命焉 不可幸而致。”可谓平正不偏矣。士大夫达则利泽施于人，名声昭于时；穷则起居无时，唯适之安，何往而不可？独不可为趑趄嚅嚅之状，俟候公卿之门，奔走形势之途耳。

又

《盘谷序》叙穷达二致可谓曲尽 第以“粉白黛绿 列屋闲居。妒宠负恃，争妍取怜”为大丈夫得志，何其小也。此乃李愿之见退之，特述其言耳，故首载愿之言曰云云。

《秋声赋》

《秋声赋》云：“奈何思其力之所不及 忧其智之所不能 宜其漉然丹者为槁木，黝然黑者为星星。”此士大夫通患也。夫力所不及而思，徒思耳；智所不能而忧，徒忧耳。吾尝有多忧多思之患，方壮而遽老，未老而先衰，坐此故耳。

罗 汉 颂

“不结良因与善缘，苦贪名利日忧煎。岂知住世金银宝，借

汝闲看七十年。”凡财积虽多而用不到，即是看也，马援谓之守钱虏。贪而造业，用又不到，闲看七十年而为守钱虏，真愚也哉！

欧 诗

“莫笑学仙人，山中苦岑寂。试看青松鹤，何似朱门客。朱门炙手热，来者无时息。何尝问寒暑，岂暇谋寝食。强颜悦憎怨^①，择语防仇敌。众欲苦无厌，有求其必获。敢辞一身劳，岂塞天下责。风波卒然起，祸患藏不测。神仙虽杳茫，富贵何意得。”欧公诗 盖身履而不知之者。

一字至十字诗格

咏 竹

竹，竹。森寒，洁绿。湘江滨，渭水曲。帷幔翠锦，戈矛苍玉。心虚异众草，节劲逾凡木。化龙杖入仙陂，呼凤律鸣神谷。月娥巾帔静冉冉，风生笙竿清簌簌。林间饮酒碎影摇尊，石上围棋清荫覆局。屈大夫逐去徒悦椒兰，陶先生归来但寻松菊。若论檀栾之操无越于君，欲图潇洒之姿莫贤于仆。

咏 石

石，石。阴黑，阳白。岸胚胎，山骨骼。天地镕铸，鬼神刻画。鲸鲵张怒眼，虎兕交斗额。敲如温玉声清，洗似精钢色碧。花边砑尔似奇品，林下礧然无俗格。冰霜惨冽坚操不移，尘土昏冥孤标自隔。峣嶷独立见刘侍中家，磊落群居在牛丞相宅。昔时大士常命汝曰听从，今日衰翁且对君为佳客。

右见文与可《丹渊集》，东坡云：“有好其诗如好其画者乎？”近滁阳林守送此集来，置之按间，试阅之，果有佳处，一字至十字格，他集未见，始录之。

经鉏堂杂志卷二

宋雪川倪思正父

《食时五观》

鲁直作《食时五观》其言深切 可谓知惭愧者矣。余尝入一佛寺，见僧持戒者每食先淡吃三口：第一以知饭之正味，人食多以五味杂之，未有知正味者，若淡吃食则本自甘美，初不假外味也 第二思衣食之从来 第三思农夫之愁苦。若此 则《五观》中已备其义，每食，用此法，极为简易。且先吃三口白饭，已过半矣 后所食者虽无羹蔬 亦自可了 处贫之道也。

训 子 弟

端谨谦和，勉进学问，可以为良家子弟矣。本之不立，纵复俊敏 堕于轻薄子之列 则才为累 识者不取也 后生戒之。

书 座 右

学贵有常，然后日新。有常与日新若相背驰，然非有常，不能日新也。

《易》

有来问我如何学《易》？自何而入？何从诣极？我告之言：

深求反惑，日用常行，坦然明白，夏葛冬裘，渴饮饥食。

泰、否

泰之初九曰：“志在外也。”否之初六曰：“志在君也。”君子于泰之时，身虽在朝廷之上，而其志未尝不在山林。唯其志在君，故与同其休戚，而无愤世之失。

程朱《易》

《易》以理寓象数，因象数以明理。汉儒多明象数，而于理或泥而不通。自王弼以玄理注《易》，儒者于谈理日胜，乃复尽略象数。二者皆得《易》之一偏。至本朝言理则程伊川为最，兼象数则朱晦庵为详^①，今集二书为一，庶几理与象数兼得之云。

《易》、《通鉴》

《易》以明天地万物之理，《通鉴》纪治乱兴亡之迹。推其理而知其盈虚，考其迹而究其得失，是其学也有用，其于用也，斯为有益。予昔之学，贪多务得，余今之学，捐华摘实。手此二书，朝夕絀绎，迨其久也，怡然理会，涣然冰释，寂然不动，退藏于密。

近之不逊

孔子曰：“唯女子与小人为难养也，近之则不逊，远之则怨。”既不可近，又不可远，然则奈何？曰：先勿近而已矣。惟先近之，一旦远之，则怨深，先勿近之，怨亦浅矣。

勿忘勿助长

上云：“而勿正心。”古说既不通，伊川以“而勿正”为一句，“心勿忘”作一句，亦不通。意味“正心”二字元是“忘”字传写失真，以一字分为二字故尔。盖养浩然之气，必当有事而勿忘，既当勿忘，又当勿助长可也。叠下“勿忘”作文法也。

人生苦乐

人生斯世，非乐即苦。乐者人之所欲，苦者人之所不堪。自非丧心之人，未有不知所避就者，然而识真苦乐者少，故列于后：

有全乐而无苦者：

逍遥无为，一念不生。
不能忘念，向善改恶。
观圣贤书，日有所益。
父母俱存，阖门和乐。
亲近师友，讲贯义理。
随力所及，济人利物。
有佳子弟，向学奉亲。
良辰美景，观玩山水。
身体康强，老而不衰。
国家安宁，时和岁丰。
父母俱庆，身登高科。
衣食粗足，知足不贪。

有苦乐相半者：

饮酒可乐，而有中酒之苦。
赋诗可乐，而有觅句之苦。